



INATSIARTUT

**Aningaasaqarnermut Nunamullu  
Namminermut Naalakkersuisoq**

Ulloq: 8. maj 2014  
J.nr.: 01.31.06/14-00662

**Aningaasaqarnermut Akileraartarnermullu Ataatsimiititaliap marlungornermi ulloq  
5. maj 2014-imi aalajangiineranik Naalakkersuisunut ilisimatitsineq**

**Suliffissaaleqinerup annikillisinniarnera siunertaralugu iluarsaassillunilu  
sanaartugassatut suliaasat siuartinneqarneri. (Suliaq nr. 01.31.06/14-00662)**

**Naalakkersuisut inassutigaa,**

- Isertitassatut aningaasaliissutit konto pingaarnermi 10.13.71 Royal Greenland A/S akilersuutit 50 mio. kroninik qaffanneqassasut.
- Aningaasaliissutit konto pingaarnermi 30.01.04 Namminersorlutik Oqartussat illuutaannik aserfallatsaaliuineq, Ilaqutareeqarneq 5,88 mio. kroninik qaffanneqassasut.
- Aningaasaliissutit konto pingaarnermi 34.10.02 Namminersorlutik Oqartussat illuutaannik aserfallatsaaliuineq, 12,7 mio. kroninik qaffanneqassasut.
- Aningaasaliissutit konto pingaarnermi 80.00.06 Suliniutinik aallartitsinissami inaarsaanissamilu sillimmatit 15,0 mio. kroninik qaffanneqassasut.
- Aningaasaliissutit konto pingaarnermi 80.00.10 Sanaartugassanut Iluarsagassanullu Aningaasaateqarfimmit utertitat 30,3 mio. kroninik annikillisinneqassasut.
- Aningaasaliissutit konto pingaarnermi 84.40.09 Ilinniartitaaneq suliniut nr. 120.51.018 Immikkut ittumik iluarsaassineq aserfallatsaaliuinerlu 2014, 1,0 mio. kroninik qaffanneqassasut.
- Aningaasaliissutit konto pingaarnermi 84.40.15 Kollegianik sanaartorneq, suliniut nr. 050.52.091 Paamiuni kollegianik sanaartorneq, 2014-imi 5,0 mio. kr.-inik qaffanneqassasoq.
- Aningaasaliissutit konto pingaarnermi 87.73.10 Umiarsualiviit, suliniut nr. 996.24.111 Immikkut ittumik aserfallatsaaliuineq iluarsartuussinerlu 2014 8,9 mio. kroninik qaffanneqassasut.
- Aningaasaliissutit konto pingaarnermi 87.73.22 Mittarfeqarfiit – mittarfiit, suliniut nr. 996.25.188 Immikkut ittumik iluarsartuussineq 2014 17,3 mio. kroninik qaffanneqassasoq
- Aningaasaliissutit konto pingaarnermi 87.75.03 "Anartarfinnut imaarsisarfinnut nutaanut tapiissutit, suliniut nr. 996.74.005 Kommunit avatangiisitigut sanaartugaannut tapiissutit 44,5 mio. kroninik qaffanneqassasut
- Aningaasaliissutit konto pingaarnermi 89.72.12 Inissiatigut suliniutit taartissanillu inissialortiterneq, suliniut nr. 996.31.029 Immikkut ittumik iluarsartuussineq aserfallatsaaliuinerlu 2014 64,0 mio. kroninik qaffanneqassasoq
- IST-p inernera inassutigineqartut kingunerisaannik 2014-imi 94,0 mio. kroninik aammalu 2015-imi 50,0 mio. kroninik ajorseriaateqassasoq.

## **Aningaasaqarnermut Akileraartarnermullu Ataatsimiititaliap oqaaseqaatai**

Qinnuteqarnerminni Naalakkersuisut kissaatigaat

- Konto pingaarnermi aningaasaliissutit 30,3 mio. kr.-inik ikilinerisigut konto pingaarnermi 80.00.10-imit, Sanaartugassanut Iluarsagassanullu Aningaasaateqarfimmit utertitanut tunngasumit, aningaasanik nuussinissaq,
- Konto pingaarnermi 10.13.71-imi, Royal Greenland A/S-imut tunngasumi, isertitatut aningaasaliissutit 50 mio. kr.-inik amerlineqarnissaat aamma
- Inassuteqaatit kingunerisaannik IST-mi angusat 2014-imi 94,0 mio. kr.-inik 2015-imilu 50,0 mio. kr.-inik ajorseriartinneqarnissaat.

Kontop pingaarnerni arlalinni sanaartornermut tunngasuni suliniutinik katillugit 174,2 mio. kr.-inik aningaasartalinni aningaasaliissutit amerlineqarnissaannut aningaasat atorneqasapput.

Suliffissaaleqisut kingullertigut amerleriarnerisa taamatut ineriartorneq illuatungilerniarlugu inuiaqatigiinnilu suliassaqartitsiniarluni ilassutitut aningaasaliissuteqarnissamik qinnuteqaammik Aningaasaqarnermut Akileraartarnermullu Ataatsimiititaliamut nassitsinissaq pisariaqalersissimagaa Naalakkersuisut isummernissamut tunngavissiaanni allassimavoq. Suliffissaaleqinerup annikillisinneqarnissaa siunertaralugu iluarsaassinissamik sanaartornermillu suliassat kingusinnerusukkut pisortanit aningaasaliiffigineqartariaqartussat siuartinneqarnissaannut ilassutitut aningaasaliissuteqarnissamik qinnuteqaatip akuerineqarneratigut Naalakkersuisut periarfissaqalissapput.

Suliaq siuliani taaneqartoq 8. april 2014-imeersoq pillugu apeqqutinik arlalinnik Aningaasaqarnermut Ataatsimiititaliaq Aningaasaqarnermut Nunamullu Namminermut Naalakkersuisumut ull. 13. april 2014-imi nassiussivoq akissutinillu ull. 24. april 2014-imik ullerineqartunik tigusaqarluni.

Aningaasaqarnermut Nunamullu Namminermut Naalakkersuisumik ull. 30. april 2014-imi apersuinermi ataatsimiititaliaq allanik apeqquteqarpoq. Ataatsimiititaliaq aalajangiitinnagu qinnuteqaammi pingaarnerusut qinnuteqarnermilu tunngavigineqartut erseqqinnerusumik nassuiarneqarnissaat ataatsimiititaliamit kissaatigineqarpoq. Tamatumani Naalakkersuisut suliniuteqarnerat ataatsimiititaliamit qujassutigineqarpoq. Taamaattorli tunuliaqutitut paasisutissiissutit annertuut qinnuteqaatigineqartunut 174,2 mio. kr.-inut toqqaannartumik attuumassuteqanngitsut arlalinnik apeqquteqarnissaq pisariaqalersippaat.

Taamaattumillu naak nukingiusilluni suliarinninnissaq Naalakkersuisunit kissaatigineqarluartoq suliaq ataatsimiititaliamit aatsaat massakkut naammassineqarsinnaasimavoq.

## **Aningaasaqarnermut Akileraartarnermullu Ataatsimiititaliami amerlanerussuteqartut**

Siumut Atassutillu ilaasortaataaasa suliap pisariaqanngitsumik sivisuumik suliarineqartariaqarsimanagera ajuusaarutigaat aammalu Naalakkersuisut ataatsimiititaliallu suleqatigiinnerisigut siunissami pinngitsoortittariaqartutut isigineqarluni. Suliffissaaleqinerup qaffasinne-rujussua isiginngitsuusaarneqarsinnaanngitsoq ataatsimiititaliami amerlanerussuteqartut isumaqarput. Aningaasaqarnerup ingerlanerlunnera pissutigalugu innuttaasut amerlasuut aningaasaqarniarnermikkut angummanniarnertik ajornakusoortikkaat tamatta ilisimavarput, taamaattumillu qinnuteqaat akuerineqanngitsoorsinnaanngilaq.

Ataatsimiititaliap apeqqutigisai akineqareersut aammalu Naalakkersuisut inassutigisaasa itigartinneqarnissaannut maleruagassatigut tunngavissaqanngitsoq ataatsimiititaliami amerlanerussuteqartut isumaqarput. Aningaasanik sillimmatitut immikkoortitsinermut

tunngatillugu oqaatigineqassaaq aningaasaliissutit konto pingaarnermiinngimmata, sanaartukkalli ataasiakkaat qinnuteqareernermi Aningaasaqarnermut Akileraartarnermullu Ataatsimiititaliamit akuerineqartarlutik.

**Aningaasaqarnermut Akileraartarnermullu Ataatsimiititaliami ikinnerussuteqartut** Inuit Ataqtigiit ilaasortaataat qinnuteqaat pillugu ima oqaaseqaateqarumapput:

Qinnuteqaat pipallataq arlalitsigullu toqqaannartumik eqqunngitsumik paasissutissiisoq akuerissallugu amerlanerussuteqartut toqqarmassuk Inuiat Ataqtigiinnit akuersaarneqarsinnaanngitsutut isigineqarpoq. Naalakkersuisut qinnuteqaammik eqqortumik nassiussinissaa-  
sa utaqqineqarnissaa imaluunniit siunnersuutip – missingersuusiornermut inatsimmi periarfissiissutigineqartutut - Inatsisartunut suliassanngortinneqarnissaa amerlanerussuteqartut Siumumeersut Atassummeersullu kissaatiginngimmassuk ajuusaarutigaarput. Minnerunngitsumik Aningaasaqarnermut Naalakkersuisup apersorneqarnermini nassuerutigimmagu qinnuteqaat ersarinngitsumik oqaasertaliorneqasimasoq.

Qinnuteqaat aammalu suliffissaqartitsiniutitut immikkut ittumik iliuuseqarneq Naalakkersuisunit akuleriissinneqarput. Tamanna ajornartorsiutitaqarpoq, taamaalillunimi aningaasat sumut atorneqarnissaat kukkusumik eqqunngitsumillu takutinneqarmat. 174 mio. kr.-it sanaartugassat iluarsagassallu siuartinneqarnerannut taamaallaat sammititaanerat erseqqilluinnartariaqarpoq. Taamaakkaluartoq suliniutit aningaasallu arlallit allarluinnarmut, tassalu suliffissaqartitsiniutitut immikkut ittumik iliuuseqarnermut tunngasut qinnuteqaammi taakkartorneqarsimapput. Tamannalu pissutaalluni qinnuteqaatip suliariniarnera pisariaqanngikkaluamik pisariusimavoq. Tamatuma saniatigut aningaasat sumut atorneqarnissaannut Naalakkersuisut takussutissiatut tabeliliaat eqqunngilaq, tamannalu Aningaasaqarnermut Ataatsimiititaliami amerlanerussuteqartut ajorinngilluinnarpaat. Kisitsisit paasissutissallu eqqortut tunngavigalugit Aningaasaqarnermut Ataatsimiititaliaq pinerit tamaasa aalajangiisassasoq Inuit Ataqtigiit isumaqarput.

Taamaattumillu qinnuteqaat Inuit Ataqtigiinnit itigartinneqarpoq.

Iluarsagassat sanaartugassallu arlallit siuartinneqarnissaannik Naalakkersuisut kissaataat Inuit Ataqtigiinnit tunngaviusumik tapersorneqarpoq. Tamanna piffinni arlalinni suliffiit attatiinneqarnissaannut peqataaqaataasinnaassasoq neriuutiginarpoq, soorluttaaq illuutit-ta sanaartugaatittalu aserfallatsaalineqarnerannut pitsaasumik kinguneqassasoq.

Akerlianilli 25,9 mio. kr.-it suliassamut suli agguanneqannginnerat Inuit Ataqtigiinnit naammagineqanngilaq. Tigusisussaq erseqqissumik ilisimanagu aningaasanik tunniussinissaq Inuit Ataqtigiit kissaatiginngilaat. Taamaattumik aningaasat suli suliassamut agguanneqanngitsut tamarmik sillimmatinut, Aningaasaqarnermut Ataatsimiititaliap akuersissuteqarneratigut atugassanngortinneqarsinnaasunngorlugit, ataatsimoortinneqassasut kaammattuutigaarput. Taamaaliornikkut aningaasat qanoq agguataarneqarnissaasa Inatsisartunit akuerseqataaffigineqarnissaa qulakkiissavarput.


Tamatuma saniatigut ukiumi tulluuttumi aningaasanut inatsisissap 52,5 mio. kr.-inik maanangaaq Naalakkersuisunit ilanngarneqarnera tunngaviusumik isigalugu toqqissisimanartinngilarput. Tamanna Grønlandsbankenimi aktianik tunisineranut eqqaanarpoq, taamani ukiut aggersut eqqarsaatiginnguarnagit missingersuutitigut amigartoorutit aaqqiiviginiarneqarput. Tamanna aappaagu missingersuutitut qanoq sunniuteqassava? Taamaattumik aningaasaqarnikkut attanneqarsinnaasumik politiki Naalakkersuisut arleriarlutik saqqummiunniarlugu

oqaatigisaat ujarparput. Naalakkersuisut aningaasaqarnikkut attanneqarsinnaasumik ilumut ingerlatsinersut suli takusaqarfiginngilarput.

**Aningaasaqarnermut Akileraartarnermullu Ataatsimiititaliap aalajangiinera**  
**Aningaasaqarnermut Akileraartarnermullu Ataatsimiititaliami amerlanerussutegartut**  
Siumup Atassutillu ilaasortaataasa Naalakkersuisut inassuteqaataat akuersissutigaa.

**Aningaasaqarnermut Akileraartarnermullu Ataatsimiititaliami ikinnerussutegartut** Inuit Ataqatigiit ilaasortaataasa Naalakkersuisut inassuteqaataat akueringilaat.

**Ataatsimiititaliaq sinnerlugu**



Jens Immanuelson  
Ataatsimiititaliap siulittaasua